

## Wosheetso P'awlos Gitl Wosho K'orontos Ashuwots Maants Kindo

P'awlos K'orontos ashuwotssh b̄ guut'ts gitlts wosho b̄guut'e K'orontosn teshts Ik'i moowunton teshts ayidek't kic'its gonkewora b̄tesh. Ik'i meyitsi ashuwots mangts k'efuwotsi biyats botuziyalor P'awlos mano woshosh eents shuno b̄detstsok'oniye b̄kitsiri, manan b̄wotor een geneúwo b̄ish shiyewo b̄falituwok'oniye b̄kitsiri.

B̄ wosh shintsi kayatse P'awlos K'orontositse teshts Ik'i moowunton b̄detsts gonkewo kitst Ik'i maamanitse tuuts gac'ewonat t k'efoon eegosh t'engidek't boosh b̄iaanitsok'oni b̄kitsir. Manton deshidek't b̄fayman boon naandrone etonat t mano maants b̄ j̄ishtsotse b̄ish shiyeets gene'úwo boosh b̄kitsiri. Manats dabtnuwere Yhuditse fa'a krstiyaniwotsi tep'osh tewudi down boimetuwok'o boosh b̄gawiyiri. B̄ s'uwaatsi k'ot'uwotsatsnowere woshets b̄woti jangosh t'intsets s'aamiyetsi jangosha aani b̄dek'ir. K'orontositsi Ik'i moowutse ash ik ikuwots botoko ari woshetswotsi woshde't P'awlosi kooti wosheke ett bos'aamifo.

### **Jamon mas'aafan b̄detstso**

Shinshintsoni 1:1-11

P'awlosnat t K'orontositsi Ik'i mowun 1:12—7:16

Yhuditse fa'a krstiyaniwots gizi tep'o 8:1—9:15

P'awlos woshets woti alo b̄ wottsok'osh aani b̄dek'oko 10:1—13:10

B̄ jamon 13:11-14

<sup>1</sup> Ik' ettsok'on Iyesus Krstossh wosheets wottso P'awlosnat no eshuu T'imotiyosoke.

K'orontos kitotse fa'a Ik' moonat Akayiyin fa'a Krstiyani wotts ash jamwotssh.

<sup>2</sup> No nihi Ik'oke, no doonz Iyesus Krstoso-knowere s'aatonat jeenon itsh wotowe.

*P'awlos Ik'osh bt'intsts údo*

<sup>3</sup> Maarts nihonat kup' jam imet Izar Izewer, no doonz Iyesus Krstos nihi Ik'osh údo wotowe,

<sup>4</sup> Noo Ik'oke nodatsiru kúp'iyon gond bek'otse beyiru jamwotsi kúp'sho no falituwok'o Ik'o noon no gond bek' jamotse kúp'shitwe. <sup>5</sup> Krstos gond bek'o ayidek'at no kayidek'tsok'on hank'o

Krstosn kúp'eyo ayide'er datsituwone. <sup>6</sup> Noo gondo nobek'or it kúp'eyonat kashon daatsitute,

no nokúp'iri itwere itkup'twok'owe. Kup'han bdatsewe no ats bodets gond bek'i naari k'amoon

it itned'tsoshe. <sup>7</sup> Noo gond bek'o it kayok'o mank'o no kúp'ono it kayituwok'o no dantsosh

itatsere nodetsts jángo kúp'e.

<sup>8</sup> T eshuwotso! Isiyi datskayotse no beyor no'ats bodts gond bek'o it danetuwok'o gee-

fone, no'ats bodts gond bek'onuwere kurosh nofalitwonyere bogo no'ats dihit b teshtotse

kashon beyosh nojangtso dab k'ut'dek're b teshi. <sup>9</sup> Mank'o k'iro no'ats angshetsok'owe noosh

shiyeyat b teshi, jaman no'ats b boduwere no amaniruwu k'irts tizitu Ik'ona bako no took an-

gon b woterawok'o nibn no dek'ishe. <sup>10</sup> Mansha bí noon hank'o een k'irosh betsit t'úp'er tawatse

kashire, kashitwe, dabnwere b kashitwok'o bine

nojágiti. <sup>11</sup> It noosh Ik' k'onon it tep'o geyituwe, ayi ashuwots Ik' k'onatse tuutson noosh imets Ik' s'aatosh aywots udo t'intsitune.

*P'awlos finosh bí ettso b'wonitsok'o*

<sup>12</sup> No it'et keewo haniye, hanwere ar b' wotok'o no nibo gawitwe, k'osh ashuwotsnat bítsnooru itnton nobeets beyo Ik'oke nodek'ts S'ayinonat kááwatse tuutsone, han b' wotuwere Ik' s'aatone b' teshi bako ash dani telefonaliye.

<sup>13</sup> Nababar t'iwintso it falit keewoniyere okoon k'osho egoru guud'atsone, <sup>14</sup> no jangosh k'atso it dantsok'o mank'o s'eenon it danetwok'o amanitwe, manshowere doonzo Iyesus b' weet aawor no itn noit'etuwok'o itwere noon it'etuute.

<sup>15</sup> Keewann arik twottsosh gitoto it t'ak'ametuwok'owa etaat shin shino iti s'ilosh geeyatniye tteshi, <sup>16</sup> Itn s'ilosh tietwere Mk'odony datso maants it weeron t beshoronat bíyokere aanar twore b' teshi, hank'onowere Yhud datso maantsan t sha'or taan it tep'etuwk'o gawatniye t teshi. <sup>17</sup> Hanowere t gawor t k'aliru danaw hake baka etirwok'o arefta itsha? Han t gawirwo iknon «ee, etonat iya'a» etaat ash gawirwok'o hake baka eton t k'altsok'o arefta itsha?

<sup>18</sup> Ik'o amanek b' wottstotse no nokeewirwo, «ee wee iya'a» etiru hake baka eton keeweyiru aap'ok'oyiyaliye. <sup>19</sup> Taanat Silasn T'imotiyosu itsh nonabtso Ik' na'o Iyesus K'rstosi «ee wee iya'a» etonaliye b'teshi, ernmó ee eto bín wotere. <sup>20</sup> Ik'o noosh b' jangits jamo, «ee» etiruwo Krstosne, mansh Ik' mangosh

Krstosn «Amen» no etiri. <sup>21</sup> Noo itnton Krstosats no kúp'ituwok'o woshtso Ik'oniye, noon galdek' futtso bíne, <sup>22</sup> Bík nowotok'o kitsit mahatabon no'ats gedtsona shino maants noosh b́ imet gaalosh no níbots S'ayin shayiro agitok'o woshdek't imtso b́ne.

<sup>23</sup> Taa K'orontos maants aanat woo t k'azitsi jango itn tshyanirawok'o itsh maac'o keewatniye, hansh Ik'o gawosh s'eegetwe, <sup>24</sup> It it imnetiyon kúp' it wottstse it itgeneúitwok'o itnton finituwone boko it imnetiyon iti azazeratsone.

## 2

<sup>1</sup> Eshe iti tshyanirawok'o gawat iti s'iilo it maants ando aanar twarawok'o k'ut'dek'niye tteshi. <sup>2</sup> Dab iti tshiyaaniyalor ityere t shyan-itwotsiyere oko taan geneeúshituwo kone? <sup>3</sup> Mank'o itsh t guut'uwere itok twoor taan geneúsho boon geyit ashuwots taan boshiyanirawok'o geeyatniye, t geneúwo it únets geneúwo b́wottok'o amanirwe. <sup>4</sup> Shiyani eenonat nibi kic'on, ay aac'uwonowere wotdek'at itsh tguut' ayidek'at iti tshuntsok'o itdanetwok'owa etni bako iti shiyaaniyosha etaatniyaliye.

### *Dadetsosh orowa etetwok'o b́ iztsok'o*

<sup>5</sup> Ash shyanitso konwor fa'e wotiyal b́shiyaniyi taan b́woterawo b́ naando k'ees'iyó wot k'aya bako k'osh weeron ititse ayuwotsnoor shiyaanire. <sup>6</sup> Han naari ashosh ititse ayuwots bíats boangshts fayó b́sh bodfe. <sup>7</sup> Mansha ashaan weeralon shiyaanotse b́kindrawok'o dab maniyere b́sh orowa err b́n it kup'iyó itsh

geyife. <sup>8</sup> Mank'owere bín it shuntsok'o aaniyi arikon it kiitsituwok'owo iti k'onirwe. <sup>9</sup> Wosh ekeewnowerere itsh tguut' fadeyar jam keewon aletswotsi it woto danoosha etaatniye. <sup>10</sup> It bísh oorowe it eteet ashosh taawere oorowe etetuwe, bísh oorowe ti eteet naando bbeyalor taa Krstos shinatse oorowe tietet itsha erniye. <sup>11</sup> Man t k'alirwere shed'ani gond fino nodantsotse shed'ano noon b́ darirawk'owa etaatniye.

*T'iro'ad datsatse P'awlos b́kic'tsok'o*

<sup>12</sup> Maniyere hakon Krstos doo shishiyo daniyosh T'iro'ad maants ti amor doonzo fini fengsho taash k'eshree, <sup>13</sup> Ernmó t eshúwi Titoyi daatso t k'aztsotse t shayiro kash de'atse, mansh manoki krstiyaniwotsi jamiyat Mek'odoniyo maants ti ami.

<sup>14</sup> Ernmó jam aawo Krstos da'oon noon jishir-wonat sheeng sháák' detsts shituwok'o Krstossh no detsts dano jam beyok nobetsitwok'o woshtso Izar Izewersh údo wotowe! <sup>15</sup> No kashit-wotssh wotowa t'afitwotssh wotowa Krstosn Ik'osh sheeng sháák'o detsts it'anok'o noone. <sup>16</sup> Ikosh k'iro maants jishit k'iri sháák' noone, k'oshosh kasho maants jishit kashi sháák' noone, beré finansh bodts wotituwo kone? <sup>17</sup> Noo Ik' aap'tso jaak k'ac' kemiru ayuwotsk'o noonaliye, ernmó Ik'oke wosheets kááw woshetswotsk'o wotar Krstosn Ik' shinatse keewituwone.

### 3

*Handr taari gútsuwots*

<sup>1</sup> Ando aani notooko údo tuuwwonooowa? Himo ik ikuwots bok'aliruwok'o itsh wee itoke noon tep'osh guut'etso noosh geyiyifek'úna?

<sup>2</sup> Ash jamo b́ dantswotsnat b́ nababirwotsn nonibots guut'ts dabdabewwots itne. <sup>3</sup> It no finon daatsets Krstos dabdabewotsi it wottsok'o daneke, woshanuwere b́ guut'e beyat beyiru Ik' shayirona bako k'elemiyonaliye, manuwere ash nibatsa bako gashets shúts tabtabats gut'ekaliye.

<sup>4</sup> Hanowere no etir Krstos weeron Ik'atse nodetsts imnetiyoshe. <sup>5</sup> Ik keewonwor nowooke b́wottsok'o gawosh flratsone, manwere eegoshe nonotokon bodknoonaliye, ernmó noon bodtswotsi woshtso Ik'oniye. <sup>6</sup> Handr taarosh finirwotsi nowotitwok'o noon falitso b́ine, hanuwere fidelon guut'ets nemon b́woteraniyere S'ayin shayiri tep'one, fidelon guut'ets nemo ud'itkee, S'ayin shayironmó kash imetke.

<sup>7</sup> Nemo fideliyon gashdek't guut'e shúts tabtabatse b́ teshi, nemo imeyori shááno k'aawe'efe bíamiri wotiyaloru Israe'el ashuwots Muse shi-itso t'iwints de s'iilo falatsno boteshi, eshe k'ir dowet nemo hank'o mangon b́ be'eyal <sup>8</sup> bére, S'ayin Shayiri weeron daatset fino bog mango deetsalkeya? <sup>9</sup> Ashuwotsats morr doots fino hank'o mango b́ detsiyakon ashuwots b́n kááw bowotit fino aawuk'oneya bog mango b́ t'ut'eti? <sup>10</sup> Ilts mango ayidek't bog b́wottsats tuutson beshts mango eegoru b́ berawok'o tawetwe. <sup>11</sup> Ili t'afitwonworu hank'o mango b́ detsiyakon, dúre

dúrosh kúp'ar beet keewonmó aawuk'oneya bog mango b t'ut'eti!

<sup>12</sup> Hank'o jangetso nodetstsosh ááwu shúk'on keewitwone. <sup>13</sup> Muse múk'efere amiru b shiits golo b t'affetsosh Israe'el ashuwots bo be'awok'o b shiitso b ipefoni b teshi, nooyere Musek'o noonaliye. <sup>14</sup> Bo nibo arikon dúnguwtseré, andish b borfetso nat taari mas'aafó bo nababor bonibo manoori ipetsmann ipetsok'one bfa'oni. Ipman ipalon bwotit Krstos s'uzn b wottsot-sne. <sup>15</sup> Hambetsish b borfetsosh nemi mas'fo nababeyi taawo bonibo ipeyirumann ipeke. <sup>16</sup> Ernmó ashó doonzo maants bíaanor «Ipeyirman k'aybtuwiti.» <sup>17</sup> Doonzo shayire, doonzo shiyiri beyokonowere s'ayin kesho fa'ee. <sup>18</sup> Noo núnets iperaw shiits wotar doonzo mango mestawtotse bek'eyirwok'o bek'irwone, Shayir wottso doonzo aro aroosh mangoniyere mango maants wonetuwone.

## 4

### *Arik wosheets fino*

<sup>1</sup> Ik'o b mhretwon bish finet finan noosh bimtsetse maac'o k'ut'r shuuts aaneratsone. <sup>2</sup> Aashtsonat jitsik wotts keewo juuk'rerone, nemi gondon fineratsone, Ik'i aap'ono kooton woniratsone, dab iki ariko sháánatse nokitsiri, notook jangoshmo ash jami nibots Ik'i shinatse ariko keewitwone. <sup>3</sup> No danits doo shishi aap'o dab ááshka wotiyal bíáásh t'afitwotsshee. <sup>4</sup> Datsani keewiru shed'ano amaneraw ashuwots níbo deekkrere, mannowere Ik'i aron

be'etso Krstos b̄mangi dooshishiyon boosh b̄sháánits shááno bobea'awok'o b̄woshi. <sup>5</sup> Noo nodaniyirwo Iyesus Krstos doonz b̄wotonat noowere notookon Iyesus jangosh it guuts nowottsok'oni bako notooko nabratsone. <sup>6</sup> «Shááno t'aluwotse shááne!» ett keewts Ik'o Krstos aron goliruwu Ik'i mango dani shááno noosh b̄ imetwok'o b̄ shááno nonibots b̄ sháánetwok'o woshre.

<sup>7</sup> Ernmó jamoniyere bogts angaan Ik'oka bako nok b̄woterawotse mangts keewan shali k'ac'ok'o wotdek'at detsdek'rone. <sup>8</sup> B̄ kaat kaaton gond bek'o noats bodiruwe, ernmó da'eratsone, ayoto daandirwonee, ernmó maac'o k'ut'ratsone. <sup>9</sup> Giishefoone, ernmó noon shunswotsi t'ud' danaknone, togere dihfoone erenmó k'irraknoone, <sup>10</sup> Iyesus kasho no at-sotse b̄be'etuwok'o Iyesus ats bodts k'iro noat-satsowere jam aawo kurdek'aatniye nogúúriri. <sup>11</sup> Iyesus kasho noats k'irituwanitse b̄be'etuwok'o no kashetswots Iyesus jangosh jam aawo beshat noimeyiri. <sup>12</sup> Mansh k'iro noyitse, kasho ityitse b̄ finiri.

<sup>13</sup> Wotowa eré «Taa amanere, manshe tkeewiri» ett guut'etsok'on, noowere imneti ik-man shayiro nodetstsotsene no amaniri, man-showerowe keewirwone. <sup>14</sup> Doonzo Iyesusi k'iroitse tiztso Izar Izewer nonowere Iyesusnton b̄ tizituwok'onat itntonwere noon b̄ shinats b̄ t'intsituwok'o danfone. <sup>15</sup> Jaman it t'k'imiyosh wotts s'aato s'eent b̄ ooyefetsosh ay ashuwotssh



ǃ bodtsi taawon Ik' mangosh wotit údo bí ayitu-wok'owe.

### *Imnetiyon beyo*

<sup>16</sup> Mansh no maac'o k'ut'ratsone, úratsi noaro ǃ t'afiyaloru gitsitsi no atso aawu aawon handr wotituwe <sup>17</sup> Keet wotts gond bek' andish nodek'irwan s'uu deshaw ayidek't een wotts dúre dúri mango noosh daatsituwe. <sup>18</sup> Noo nokotirwo be'eraw keewoni bako be'eyirwoniyaaliye, be'eyirwo andkee, be'erawonmó dúre dúrikoniye.

## 5

<sup>1</sup> And gofok'o wotts datsatsi nomeetso ǃgahor ash kishon ǃ woterawo Ik'on ageets dúre dúri beyoko darotse nodetstsok'o danfone. <sup>2</sup> Andi beshit gofanitse nobeyor kashe no k'ushiri. <sup>3</sup> Mansh no meets datsatsan ǃk'alewor araats wotaarr datseratsone. <sup>4</sup> Arikon k'iritwo kashots ǃk'ot'etwok'o tahdek'osha bako noatse giin-bazeyo no shunaawotse noo daritsi atso han abaats dabde'er tahdek'o geefone, mansh datsatsi dunkaniyotse fa'uwots noo noats ǃmangre kasho nok'as'iri. <sup>5</sup> Keewansh noon k'anitso Ik'oniye, maniyere bog keewo noosh ǃ imetu jamosh agito ǃ wotish ǃ shayiro noosh imtso bíne.

<sup>6</sup> Datsatse no atson no befetsosh doonzo'atse no woktsok'o no danaloru jam aawo bín amane-tuwone. <sup>7</sup> No nobeyir amanona bako keewwotsi bek'onaliye. <sup>8</sup> No beewok wotts meetsanit-sere k'aleyar doonzonton wotoshe no tewniri,

mansh amanon beetuwone. <sup>9</sup> No meetsanton nowotiyal wee býatse no k'aleyál no k'os'ó doonzo geneúshe. <sup>10</sup> Datsatsi beyon nok'altso gond wotowa doo keewosh ik iko b́ finok'o b́ k'auntso dekwosh noúnets Krstos angshi jori shinats t'ino noosh geyife.

<sup>11</sup> Doonzo shato eeg b́wottsok'o no dantsosh, ashuwotssh sheenga err bodek'etwok'o woshitwone, no eeg nowotok'o Ik'o danfee, itwere it nibotse eeg nowotok'o it danetuwok'o jangirwe. <sup>12</sup> Nibotse beyiruwon b́ woterawo be'eyiruwon it'iruwotssh aaniyo it falituwok'o noon it it'etuwok'o itsh gowo imetuwone bako aani no itsh notooko úderatsone. <sup>13</sup> Geetsuwotsi no wotiyaloweré Ik'osha etaatniye nogeyi, nibetsuwotsi woterone wotiyaloweré itsha etaatniye nibetsuwotsi nowoti. <sup>14</sup> Manjangosh Krstos shuno noon detsetwe. Iko jametsosh b́k'irre jametsotswotswere bok'iro dan-dek'roone. <sup>15</sup> Kashon fa'a jamwots boosh k'irtsonat k'irotsé tuutsosh bobeeuwok'owa bako haniyak botookosha err boberawok'o Krstos jametswotsshoweré k'irre.

<sup>16</sup> Haniyere okoon noo asho konnor meetsi s'iil s'iilon s'iilatsone, haniyere shin Krstosnor nos'iil ash jamikok'o meetsi s'iil s'iilona wotiyal shinomaants han k'alratsone. <sup>17</sup> Mansh eshe asho konuwor wotowa Krstos jiro b́wotiyal handr azeeke, nattso beshwtseré, jamonu handr wotwtseré. <sup>18</sup> Jamhan b́wotuwere noon b́ tookonton Krstosn manitsonat maniyi fino noosh imts Ik'one. <sup>19</sup> Hanuwere Ik'o Krstosn datsatsi ashjamo b́tookonton maniree etee, bo naan-

donowere boats taawratse, nooshowere asho doonzonton nomaniyish bí aap'o noosh imre.

<sup>20</sup> Ik'o ashuwotsi noweeron b́ s'egetwotse Krstos shegro wotat wosherone, mansh «Ik'onton manewere!» err Krstos shútson itn k'onitwone <sup>21</sup> Noo Krstosn Ik' kááw fino kayituwotsi nowotitwok'o Ik'o morr deshawo Krstosi no morrosh wosho bwotitwok'o b́ k'ali.

## 6

<sup>1</sup> Ik'onton tohaat finirwotsi nowottstotse it-dek'ts s'aato datsmec'ron oorik'r k'ayere etaat itn k'oniruwe. <sup>2</sup> Ik'o,

«Taash wotts aawots nkeewo k'ebre!

Kashiya aawotsowere neen tep'ree!» bí etirwotse

«Eshe hambe! wotts aawo andee, kashi aawonwere andee.»

<sup>3</sup> No fino k'efeerawok'o ik keewon konshor t'ugo woteratsone. <sup>4</sup> Maniyere

gond bek'ona, ono bek'ono, k'ic'onowere k'amefetsr Ik'osh finirwotskok'o notooko jam weeron t'intsituwone. <sup>5</sup> Ik'osh fintsuwotsi

nowoto nokitsitwere jot'ewon, tipewon, noats tuuzeyiru dimbiron, finon maawon, tokr t'ut'onat s'oomiyonee, <sup>6</sup> Mank'owere s'ayinon,

danon, k'amoon, doowoton, S'ayin shayiron jisheewonat bíats daro bítse aalts shunon,

<sup>7</sup> ari aap'onat Ik' angone. Bín da'osh wotowa noatse k'arbazosh kes'i kac' wotts kááw fino no k'anonat giri kishon deshdek'etwone.

<sup>8</sup> Mangosh wee ketosh, k'orewosh wee údewosh k'an dek'k noone, aretswotsi nowotefere,

dirshswotsi eteyi. <sup>9</sup> Danetswotsi wotefetsat danerawwotskok'o nowoti, k'irrne etefere hamb kashetswotsi wotat nodatseyri, no jot'eyaloru úd'eratsone, <sup>10</sup> Shiyano noats b bodaloru jam aawo geneúituwone, tuguretswotsi wotefetsat ayuwotsi gaaletso nowoshiri, eegoru deshawwots wotefetsat, jam keewo detsfone.

<sup>11</sup> It K'orotasn beyiru ashuwotso! hamb, itsh kish dek'at keewurone, no nibonowere gawintsdek'at itsh k'eshrone. <sup>12</sup> Itna itshuno noosh baziyi bako no itsh bayatsone. <sup>13</sup> Niho bnana'úwotssh bkeewfok'o tkeewre, noo nonibo gawunon k'eshde'er nogitsotse shisheyirwo itsh kish nokitsok'o itwere mank'o noosh k'aluwere.

*Amaneraw ashuwotsnton ikwot'azo*

<sup>14</sup> Woteraw finon, amaneraw ashuwotsnton ikn s'andek'ayere, kááwonat morron awuk'o k'alrniya ikwoto bofaliti? Sháánonat t'aluwon towaar beyo aawuk'oneya bofaliti? <sup>15</sup> Krstosnat Diyablosn aawuk'oneya ik woto bofaliti? Amantsonat amanerawonmó aawuk'oneya kod'ewo bofaliti? <sup>16</sup> Ik'i maa S'ayino woteraw dozets ik'uwotsnton eeg ikwote b'detsi? Ik'onwere,

«T beyokonowere tiashuwots taalots woshituwe,  
Bontonwere beetwe,

Taa boosh boko Izar Izeweri wotituwe,

Bowere ti ashuwotsi wotitúne»

ett b keewtsok'on no beyat beyiru Ik'osh S'ayin Ik' maa noone. <sup>17</sup> Manats dabt doonzo hank'o etre,

«Bo dagotse galeyar keere,  
 Kim wotts keewo t'awik'ayere,  
 Taawere iti dek'etuwe,  
 18 Taawere itnihi wotituwe,  
 Itwere t nungush nana'úwotsnat mááts  
 nanaúwotsi wotitute,  
 Etre jam faltso Izar Izeweri.»

## 7

<sup>1</sup> Tmashotso! jam keewo jangit noosh imet-  
 sotse atsonat shayiron kimshit kon naari kee-  
 watse notooko s'ayitsuwone, Ik' shatoon S'ayin  
 nowoto s'een b wotituwok'o woshwone.

### *P'awlos gene'o*

<sup>2</sup> It nibon noon de'ere, no konnoru daderat-  
 sone, konatsor gondo fineratsone, dirshon konat-  
 sno ik jago geeratsone. <sup>3</sup> Hano t etir itats  
 angshoshaliye. Haniye shini itsh tkeewtsok'o it  
 no nibots itne, eshe kashon wotowa k'iron jam  
 aawo itatse k'aleratsone. <sup>4</sup> Itatse tdetsts imnetiyo  
 eene, itatse tdetsts it'o eene, kup'wtsere, nokic'  
 jamon ayide geneúituwe.

<sup>5</sup> Mek'edoniyots nobodiyakon ay kaaton  
 gondbek'a no atsats bodi bako kash  
 dek'o iknotonor daatsratsone, úratse fayó  
 gitsotsnowere shate nodetsi. <sup>6</sup> Ernmó  
 juweetswotsi kup'shit Ik'o Izar Izewer Tito  
 b'woon noon kup'shre. <sup>7</sup> Nokup'uwere b  
 waats mec'rosh b'woterawo it bín it kup'shtso  
 noshishtsotsne, t jangosh it detsts mirac'o,

shiyanonat tjangosh it kic'irwok'o noosh bkeewre iki tgeneúwi.

<sup>8</sup> Haniyere shin itsh t guut'ts wosho itn shiyaanik bwotiyalor dab woshman tguut'tsotse goyineratse, goyinere wotiyalowerere tgoyin twoshon múk'na'a gizewosh itn tshiyanitstsne. <sup>9</sup> Andmó gene'owerere, tgene'útsonuwere eegoshe itn tshiyanitssosh bwoterawon it shiyantsatse tuutson naandrone etaat itwonetsotsne, eshe it shiyano Ik'o ettsok'o bwottsotse no itn eegor daderatsone etee. <sup>10</sup> Ik'o ettsok'on wotts shiyano woro maants jishituwo naandre eton daatset wonewo bdaatsitwotse goyino dooratse, datsatsi shiyanonmó k'ire bdoweti. <sup>11</sup> It shiyaanan Ik' ettsok'on bwottsok'owo awuk'o kup'de fino, awuk'o wotts aniyidek'o, awuk'o kááron fayó, awuk'o shato, awuk'o mirac'o, awuk'o okooro, awuk'o sezonowere bdootsok'owo nibnde'er t'iwintsde s'iilere. Ando it jam keewon s'ayin it wottsok'o gawon gawirute.

<sup>12</sup> Itsh t guut'alor taa itsh tguut' no jangosh itdetsts kup'ar fino Ik'o shinatse itsh shaanr bdaneetwok'owa etaatni bako morro bín dadets ashosha etaatniyaliye. <sup>13</sup> Jamanatse tuutson noo kup'erone, no nokup'tsoniyere bogo ando Tito bdaatsts geneúwon iki ayidek'at geneeúweroone, manu eegishe bshayirosh kashdek'o itdatsitsoshe. <sup>14</sup> It atse t detsts it'onowere Titosh keewre bteshi, itwere taan jitsiratste, jam aawo itsh arikeewono itsh keewufoone bteshi, hanuwere it jango Titosh nokeewtso itn it'o arbwotoon be'ere. <sup>15</sup> It únetswor azazeyirwotsi itwottsotsnat shatoonat

k'ewon bín itdek'tsok'owo Tito b́gawor itsh b́detsts shuno ayidek't eeno wotere. <sup>16</sup> Taawere jam weeron itn it'o tfaltsotse iki bogshdek' geneúwere.

## 8

### *Krstiyaniyots tewdo*

<sup>1</sup> T eshuwotso! Ik'o Mek'odonin fa'a Ik' maa moowwotssh b́ imts s'aato itsh daniyo shunfone.

<sup>2</sup> Bowere ay gond bek'on faderne, b́woteferoru bogen'úo ayidek't eene, ayidek't tugurtswotsi bo wotiyaluru dab een teudo woshrne. <sup>3</sup> Bo faltok'onat bofaltsoniyere bogo bo shunon bo imtsok'o taa boosh gawitwe, <sup>4</sup> Yhud datsatse beyiru Kirstiyaniwots ash tep'i gowo boosh baziyerawok'o kup'idek't noon bok'oni. <sup>5</sup> Bowere bo k'oltso no nokotirwonyere boge, shin shin botoko doonzosh boimi, manats dabtnu Ik' shunok'on botoko noosh imrne. <sup>6</sup> Finan shin shinon fintso Titoyi b́ wottotse andoor bo teudi finan s'uwaats de'am b́ betsitwok'o b́n k'onitwe

<sup>7</sup> It imnetiyon, noon keew keewon, danon, kup'on, nooke dan itdek'ts shunon jam keewono bogfte, tewd dooyi finannowere it bogetwok'o wotowe.

<sup>8</sup> Eshe, tietir azazonaliye, ernmó k'oshuwots imon kup' woto it kup' wotonton no nohir it shuno ar b́ woto shu'ar s'iilosha etaatniye. <sup>9</sup> It no doonz Iyesus Krstos s'aato danfte b́ eegoru dab gaaletsk b́ wotiyaluru b́ tugurets wotat it galetswotsi it wotituwok'o itsha ett tugretsk b́ woti.

<sup>10</sup> Han jagosh itsh sheeng araat be'ets izo itsh imetwe, beshts dúron im mec'r b́ woterawo han k'alosh shini geetswots itne b́ teshi. <sup>11</sup> Eshe imosh it detsts shúno finats jitsit s'uwó maants b́ bodetwok'o it faltsok'on it gawts man and k'aluwere. <sup>12</sup> Imosh sheeng shun detstso b́ beyal ashman tewdi doon b́ detstso b́ imala boko bíangalon bímíshaliye.

<sup>13</sup> Hanowere ti etir it únets taalo it wotitwok'owa bako it imon it kic'efere k'oshwots bín kash bodek'isha etaatniyaliye <sup>14</sup> It it kic'or bogizo it kic'ats b́ jinetwok'o and it gizo bok'ic'ats jinee, hank'on it dagotse manuts woto beetwe. <sup>15</sup> Hanwere, «Ayi ko'itswotssh oreratse, múk' ko'itswotsshoweré shapratse» ett guut'etsok'one.

### *Titonat b́tohuwotsn*

<sup>16</sup> Taa itsh t shiyanirwok'o Titowere itsh b́ nibon b́ shiyanituwok'o woshts Ik'o údewe. <sup>17</sup> Tito it maants b́weet b́ took shunon tuut gene'ona bako no nok'onts mec'roshaliye. <sup>18</sup> Doo shishiy nabon Ik'maa jamooke údetso eshúwo bínton woshitwone. <sup>19</sup> Haniyere dambon eshuwan no sheeng finan doonzo mangosh nofinorat finosh nodetsts sheeng shuno nokitsor noonton amt nofinman b́ tep'etwok'o Ik'i moowwots n marat'etsoniye.

<sup>20</sup> Tewdi doon imets gizan nok'eezor noshútso b́ t'afrawok'o no atso kordek'etwone. <sup>21</sup> Noo nogeyiru keewo doonzo shinatse s'uz b́woterawo ashuwots shinatse kááw wotts keewo k'ale.



<sup>22</sup> Ayoto ay weeron fadere kup'at fintso wotat daatsetso no'eshuwi Titowi bonton woshitwone, bí itatse b́detsts imnetiyo een b́wottstotse and finann iti tep'osh b́detsts kup'at fino awurt-sooniyere boge. <sup>23</sup> Tito jango dano b́geyitka wotiyal itn tep'osh taanton finirwo, fini weeron ttohe, b́nton tohaat weyiru k'oshwots jango b́wotiyalowere bo Ik'i moowwotsatse naashuwots, Krstos mangosh need'tswotsiye. <sup>24</sup> Mansh it shúno boosh kitswere, hank'on it shunonat itatse nodetsts it'o k'awtsalko b́ woterawok'o Ik'i maa jamwotssh kitsitute.

## 9

### *Krstiyaniwotssh kischeets gizo*

<sup>1</sup> Yhuditse fa'a krstiyaniwotssh kischeet gizo jango itsh guut'o taan geyiratse, <sup>2</sup> «Akayiy dats ashuwots natstsoon tuut tep'osh k'andek'kne» etaat mek'edoniitsi ashuwotsoke it jangosh ti ít'ir it kup'ar it finitwok'o t dantsoshe, it kup'at itfiintsonwere k'oshwotsnoor tuuzere. <sup>3</sup> Keewanatse itatse no detsts it'o dats mec'ro wotar boorerawok'o eeshwanotsi woshiirwe, itwere ari taa haniyere shin ti ettsok'o k'ande'er korere. <sup>4</sup> Mek'edoni dats ashuwots taanton itok waarr itk'ande'aawo bodatsiyal itats noit'tsatse tuutson jiitsitwone, itmó ayde'erniye itjiitsiti. <sup>5</sup> Mansha imetuwone it etts tewud doon it imiruwo it k'aniyitwok'o itsh bogawitwok'owa etaat eshwaanots taayere shino itok boweetwok'o wosho b́ geyiko b́wottstok'o daatsre, mank'oon taa twoor tewudi downon it imetuwo

k'anke b'wotiti, itwere it imet angnon b'woterawo shunon b'wottsok'owoniye b'kitsiti.

<sup>6</sup> «Múk'shde shooketwo muk'e b'kakuwiti, ay shooktso aye b' ko'iyiti» ett keewetso gawde'ere.

<sup>7</sup> Eshe Ik'o b'shunfo geneúwon imet asho b'wottsotse asho ik ikon b'nibotse imosh b'geetso shunr ima bako shiyaanefetsr wee b'maac'otse aalo imk'aye. <sup>8</sup> Jam aawo jamkeewon it tooko falr shengfínats jinosh itfalitwok'o ayide b' deero itsh imo falfe. <sup>9</sup> «Hanwere t'owwotssh tewdi down imre,

B kááw finonwere dúre dúrosh beetuwe»  
et t guut'etsok'one.

<sup>10</sup> Shooko shooktsosh, moowosh misho imirwo Izar Izewer it shooket shooko ayde'er imetwe, it kááwi shuwonowere itsh ayituwe. <sup>11</sup> It tewdi doo noweeron boosh b'bodiru ash jamwots Ik'o bo úditwok'o jam aawo it imetwok'o Ik'o jam keewon iti deritwe. <sup>12</sup> It kaliru tewdi finan krstiyaniyots kic'otse kishoniyere bogo ashuwots Ik'osh ay udo bot'intsitwok'o woshitwe.

<sup>13</sup> It tewdi dowi finann Krstos doo shishiyo dek'at b'ish azazetswotsi itwottsok'onat, bonat k'oshwotsnsh tewdi doo kitsosh b' wottsotse jametswots Ik'o úditúne. <sup>14</sup> It atse fa'a s'eent kud'ts Ik'i s'aatatse tuutson itjangosh Ik'o k'onfetsr itn gawitune. <sup>15</sup> Ash noon keewon keewosh falerawo bí imtsosh Ik'o údeek wotowe.

## 10

### *P'awlos b'finijangosh aani b'de'ktsok'o*

<sup>1</sup> Taa P'awlos it shinats twotor ááwu nefe eteyiri, itokere tworomó ááwu shúk'e eteyiri,

Krstos doowoatonat maac'nefon iti k'onirwe,  
<sup>2</sup> Meets ettsok'on no sha'irwok'o woshdek't  
 taawiru ik ik ashuwots shinatse ááw shuuk'on  
 keewo t geeyiyaluru itok twoor ááw shuk'on t  
 keewitwok'o k'alk'ayere. <sup>3</sup> Dab datsanatse no  
 beyaluru nokaarit datsatsi kaaraliye. <sup>4</sup> No kes'  
 k'ac'onwere ááshet gop'o gaak faliyit Ik' ang  
 detstswoni bako datsanatsi kes' k'ac'wotsiliye.  
<sup>5</sup> Ik'o danosh t'ug wotar tuwit mooshonat míshon  
 gaaketwone, asaabi jamono k'aa'uder Krstossh  
 bíaletwok'o woshitwone. <sup>6</sup> It aleyo s'een b'wotor  
 konnari alek'azono sezosh k'andek'tswotsi wotit-  
 wone.

<sup>7</sup> It its'iilirwo úratse bek'eyiru keewo s'uziye,  
 asho konwor wotowa Krstosk taane ett bíatso  
 amanirwo aanide'er t'iwintswe, noowere  
 bíkok'o Krstosk nowottsok'o dande'e. <sup>8</sup> Doonzo  
 noosh bímts alon ayide'er ti it'alor bín jitseratse,  
 alan noosh ime iti agosha bako gaakoshaliye.  
<sup>9</sup> T woshon itn t shat'yirwok'o ark'ye itsha. <sup>10</sup> Ik  
 ikuwots «P'awlos woshwots mangtswotsnat  
 kup'knee, bí b'tookon noonton b'wotormó  
 maawke, b' noon keew keewonwere k'awntsálke»  
 etiirunee. <sup>11</sup> Man etiru ashuwots noo wokoon  
 wotdek'at nowoshtswotsitse noguut'irwonat  
 t karnonowere itnton wotdek'at nofiniruiwi  
 dagotse k'osh k'osho b'beerawok'owo dande'ene.

<sup>12</sup> B' wotefere botoko údiru ash ik ikwotsnton  
 no tooko nohiwosh wee notooko nuutsir s'iilosh  
 ááwo shu'atsone, bomó botoko botookonton  
 botatstsonat botookonowere botookonton  
 bonohitsotse t'iwints dek'knaliye. <sup>13</sup> Noomó dab  
 itok no borfetso Ik'o noosh b' imts fini gúúron  
 it'etuwoone bako tatsoniyere dambo id'atsone.

<sup>14</sup> It beyruwere nofiniru gúúrots b'wottsetse Krstos dooshishiyo daniyoh itok nowoor gúúrmaniyere beshersatone. <sup>15</sup> Mansha Ik'o noosh b'beeze gúúroniyere beshar k'oshwots finon weeralo id'atsone, maniyeremó it imnetiyo b'daboor Ik'o noosh b'beeze gúúrotse noon it mangitwok'o tewnirwone. <sup>16</sup> Eshe k'osh ashi fini gúúrots kindr shin finets finon noid'awo itiyere oke fa'a datswotsatse bíko doo shishi aap'o shishiyosh falfone.

<sup>17</sup> Ernmó «It'etwo doonzon id'ee.» <sup>18</sup> Asho údewosh b'bodet doonzo bín búdora bako b'tooko b'tookon búdoraliye.

## 11

### *P'awlosnat kootets woshetswotsn*

<sup>1</sup> Taa muk'i dog t wottsetse taash it k'amitwok'o jangirwe, oona! taash k'amde'ere. <sup>2</sup> Baarna'a s'eenu ikukok'o iti kenih iko Krstossh twid'tsetse, Ik'i okooron okoorirwe. <sup>3</sup> Dawunzo Hewaani weeri gondon b' sheelitsok'o daneraka it asaabiyonwere awaashwtsar Krstossh itdetsts okooronat s'ayinon wottso it amanewo k'ayk'ritute etaat shatirwe. <sup>4</sup> Ik asho itok waar no nó nabtso b'woterawo k'osh Iyesusi itsh bnabiyal wee it itdek'ts shayiro b'woteraniyere k'osh shayiro itdek'al, wee it dek'ts doo shishiyo b' woterawo k'osh doo shishiyo it dek'al, s'k etaatni it dek'i etee.

<sup>5</sup> Ernmó taa een een woshetswotsiyere jam keewon tdashtsok'o areratse. <sup>6</sup> Noon keewon

dantso woto tk'azaloru dab dano taash shapatse, hanowere ayoto ay weeron kishdek' itsh danirone.

<sup>7</sup> Taa Ik'i doo shushiyo itsh k'awntsalon tñabonat itn dambaan tizosh t tooko dashan t detso morrok'oweya b taaweyiri? <sup>8</sup> Itsh finosh k'osh Ik' moowwotsoke tep'o dek'at boon biik're.

<sup>9</sup> Itnton theyor taash wotit keewo b shapor, Mek'odonyon waats t eshwots taash geyits jam keewon botep'irwotse konatsoru kuro woteratse, andish b borfetsosh itats jam keewon kuro woteratse, shino maantsisho kuro woteratse.

<sup>10</sup> Krstos arikeewo t gitsotse b beyirwtse hanatse tuutson t id'awok'o woshitwo Akayiyi datsatse konworu aaliye. <sup>11</sup> B jango eebi? Itn shuno tk'ztsosheya? Itn tshuntsok'o Ik'o danfee.

<sup>12</sup> K'osh wosheets manots, «No bonk'o finirwone» err boit'et weero t'ut'iyosh and tk'alirwok'o shino maantsoru dab k'alituwe. <sup>13</sup> Hank'o ashaanots Krstossh woshetswotsi aroosh botook wonawoniru kootets woshetswotsnat ash ant'elcef finetswotsiye.

<sup>14</sup> Hanwere adiyit keewaliye, shed'anonworu dab shááno melakiwotsi aroosh b tooko bwoniti. <sup>15</sup> Mansh eshe shed'anosh finirwots kááwosh finirwotsi aroosh bo tooko bowoniyal noon adiratse, s'uwatse bo fini k'awntso daatsitune.

*P'awlos wosheetso bwottsosh bíyats bodts kic'o*

<sup>16</sup> «Asho konwor dartso twottsok'o bish ark'aye» err aani keewituwe. Dartsitwotiyaloru dab múk'i t it'etwok'o dartsok'o woshde'er taan

taawwore. <sup>17</sup> Hank'o it'on tkeewor t keewirwo doonzo shunok'o b woterawo dartsok'o wotatniye. <sup>18</sup> Aywots meets keewon bo it'iruwosh taawor it'etuwe. <sup>19</sup> It t'iwintsirwotsi it wottsok'on dartswots jangosh gene'on k'amitute. <sup>20</sup> Hank'o konworu guutsok'o itn b woshiyal, konworu itko bmaal, iti bfiniyal, iti bgac'iyal, it malalats b jabiyaal k'amitute. <sup>21</sup> Taan jitsitka wotiyaloru dab keewanotsi finosh kup'uwotsi wotnok'azo itsh kitsitwe.

Ernmó konwor it'osh ááwo b shúk'ol taaworu bíkok'o ááwo shúk'twe, hanowere ti etir and dartsok'o wotatniye. <sup>22</sup> Bo Ibrawi ashnowa? Taawere Ibrawi ash taane, bo Israe'el ashnowa? Taawere Israe'el ash taane, bo Abraham naarnowa? Taawere Abraham naar taane. <sup>23</sup> Bo Krstos guutsnowa? Taawere boyere bogo Krstossh guuts taane, hanowere ti etor geyetsok'o wotatniye t keewiri, boyere bogo ayoto finon mawure, ayoto tipere, ayoto jot'ere, ayoto k'iri t'up'er tawats bodre, <sup>24</sup> Útsoti shaashe jeed'iyoto ayhudiwots k'ac'eyon jot'ere, <sup>25</sup> Keezoto gúmbon jot'ere, iknoto shútson k'is'ere, keezoto markabotse t'up'er tawo tiyats bodre, ik t'úwonat ik aawon aats k'aratse t teshi, <sup>26</sup> T sha'i ayon foki s'eenonat aats di'on, biik'irwotsn bik'ewo ti'ats bodre, Ayhudi jirwotsnat Ik' ash woterawotsokere t'up'er tawo tiyats bodre, Kitionat worwotse aats k'aratsnowere t'up'er tawo tiyats bodre, manko kootets amantsuwotsoke t'up'ertawo tiyats bodre. <sup>27</sup> Ayo finonat maawo

---

**11:23** 11:23 Wosh. 16:23      **11:25** 11:25 Wosh. 16:22; 14:19

**11:26** 11:26 Wosh. 9:23; 14:15

detsfe b́ teshi, ayoto tokro t t'utfoni, k'ak'efe, shashwefe, ayoto mish t'ut'o tiyats bodre, ak'onat araats woto tiyats bodre. <sup>28</sup> K'osh jam keewo t taawoniyere Ik'i moowwotsosh aawu aawon shiyanat t kic'efoni. <sup>29</sup> Maawrawo kone, taawor mááwratsta? ash iko morron b́ dihor taawer nib t k'únaw aawo egore?

<sup>30</sup> It'o b́ geyitka wotink'e taa b́n ti it'etwo taa maaw ash twoto kitsit keewwotsne, <sup>31</sup> Dúre dúrosh údeek wottso no doonz Iyesus nihi Ik'o t koorawok'o danfee. <sup>32</sup> Demask'o kitotse tbeyor nugúso Aretasiyere dashe dats k'eeziruwo taan detso geeyat kitutse b́n keshet weero kotirwotsn b́ kotifere b́ teshi. <sup>33</sup> Wotowa bako ashuwots kas'i tungushi fúri weeron ooshon taan oorsh bok'rere b́ kishotse k'az t keshi.

## 12

### *P'awlos bek'o*

<sup>1</sup> Dab it'otse daatset keewo b́ t'ut'aloru it'etwe, ernmo and doonzoke tdaatsts bek'onat be'etson keewo shunfee. <sup>2</sup> Krstosk wotts ik asho danfee, ashaan tatse awd natoniyere shinon keezl darok b́ borfetso b́ dek'eyi, b́ dek'ewewere b́ meetsononi wotowa b́ meeston wot bk'zo danatse, Ik'o danfee. <sup>3</sup> Ernmó ashaan Geneto maants b́ dek'etsok'o danfone, b́ meetson wotowá wotbk'azon danatsone, Ik'o danfee, <sup>4</sup> Bíwere Geneto maants dek'eyat ash noon keewon keewosh falerawonat asho keewo b́ falaaw keewo b́ shishi. <sup>5</sup> Hank'o ashonn it'etuwe, t tokoshomó maawuk t wotoniyere okoon k'osh b́n ti it'et

keewo aaliye. <sup>6</sup> Eshe, taa ariko tkeewirwosh it'o tgeyialor dartsi woteratse, ernmó konwor tiatse b́bek'irwonat tiyoke b́k'ebirwonyere bogshde'er taan b́s'iilawok'owa etaat it'atse tiatso kotdek'irwe.

<sup>7</sup> Taash be'ets een een keewanotsatse tuutson t id'awok'o t meetso angitsok'o koshet weesho taash imeyi, hanuwere shed'ani melakiyo wotat taan túúzit onobek'shr ti id'awok'o taan b́woshiti. <sup>8</sup> Taan weeshiru keewan tiatse b́ k'aawu'etwok'o doonzo keezoto t k'oni. <sup>9</sup> Ernmó «Ti ango s'eenon b́fiinit n maaw manits b́wottotse ts'aato neesh bodfe» taash bíeti, mansh Krstos ango tiats b́wotitwok'o jamonyere bogo maawk twoton geneúfetsr it'o shunfee <sup>10</sup> Ango t daatsit maawk t wotor b́ wottotse Krstos jangosh t maawor, t c'ashewor, gondo tbek'or, t gishewor, tkic'oro geneútwe.

<sup>11</sup> Doogok'o keewre! eshe hank'o tkeewitwok'o taan k'altswots itne, taan údiyank'wots itna b́teshi, taa daneraw ash twotiyalor dab een eenne eteets woshetswotsiyere eegonor dasher-aatse. <sup>12</sup> Ari wosheetso twoto kitsiru keewwots itnton tbewor k'amoon t k'alts fiinwotsiye, mi-likitanotsnat adits keewanotswere adiknee. <sup>13</sup> It ats kuro wot tk'azoniyere okoon k'osh Ik'i moow-wotsiyere iti t dashiyi eegnaya? Hanuwere naandok'o b́taawetka wotiyal taash oorowe erere!

<sup>14</sup> Itok wosh k'andek' ttuwiyakon han keezloniye, taa itats kuro woto geeratse, taa tgeyir itna bako it gizoniyaliye. Bo nana'osh giz kakuwo b́s'ili ind nihwotsi bako nanaúwots indnihwotssh gizo ko'irakne. <sup>15</sup> Itsha err dab t gizonat t tookon beshide'er t imink'e ayideniye t



geneuti, eshe taa itn ayidek'at t shunfere it taan it shunir hank'o múk'sh dek'atneya?

<sup>16</sup> Ekewin wotowa hann wotowa taa itsh kuro woteratse, weeri gondonat ant'elcon iti tdetst-sok'oye itsh bíari.? <sup>17</sup> T woshts ashuwotsitsere ikon dab kis'o keshrta? <sup>18</sup> Tito it maants b́ weetwok'o t k'oni, no eshu manowere b́nton t woshi, eshe, Tito itoke t'k'miyo datsra? Taanat b́n itsh nofin ik shayiron woteratsa? No sha sha'onwere ik woteratsa?

<sup>19</sup> It únets andish b́ borfetsosh it gawir noo it shinatse notook jangosha etaat aninodek'irwok'o woshdek'aatni k'úna? Noo Krstosn wotdek'at nokeewirwo Ik'o shinaatsne, shuneetswotso! no jaman nokeewir iti kup'iyosha etaatniye. <sup>20</sup> Taa manmaants t woor daneraka it wotish t geyirwok'o it woterawon, taawere it itgeyirwok'o twoterawo gonketwonek'úna etaat shatirwe, mank'o itoke kaareyo, okooro, fayó, tookshuntsi woto, ash shúúts t'afiyo, óóno, bogtaana etonatonat dimbron beetúne etaat shatirwee. <sup>21</sup> Aani aanar itok twoor tiko Izar Izewer daneraka taan itshinatse ketitwe etaat shatirwe, haniyere shin bofints morratse tuutson kiimo, wido, shiraats jintsi wotatse tuutson naandrone eraaw ashuwots jangatse shiyanots kindiftak'úna etaat shatirwe.

## 13

### *S'uwaatsi izonat jamon*

<sup>1</sup> Eshe, itok twoor han keezloniye taasha, awror b́wotiyal jam keewo arik b́ wotit wee

git wee keez gawwotsne. <sup>2</sup> Gitlts s'iilo twoor itnton tteshor it tooko kor itdek'etwok'o keewatniye t teshi, andoor aaniy haniyere shin morro fintswotsnat k'oshwotsshor boatso kor-bodek'etwok'o keewitwe, and taa itok aanar twoor konshor maac'o k'eweratse, <sup>3</sup> It t git-sotse beyat keewirwo Krstosi b'wottsok'o dan-dek'oshe itgeyiri, itoke beyrwo b'kúp'a bako b'maawoniyaliye. <sup>4</sup> B'í mask'aliyats jiteyat b'k'ir maawona wotiyalor and Ik'i angon kashone b' beyiri, noowere b'ikok'o maawtswotsi woterone, itnton nodetsts gonkewok'onmó b'inton Ik'i angon beetuwone.

<sup>5</sup> It amantsatse it kúp'tsok'o sheengsh danosh it tooko t'iwintsde'er s'iilere, it atsono fads'iilere, Iyesus Krstos itgitsots b'wottsok'owo t'iwintsde'atsteya? Mank'o woto b'k'zal fadewor dihrte etee, <sup>6</sup> Noo fadewor nodihrawok'o dan itdek'etwok'owe nojangiri. <sup>7</sup> Gond keewo itk'alrawok'o Ik'o k'onirwone, Ik'o nok'onirwere no took faltswotsi wotat be'erani no'ooriyal it úni aawo sheeng wotts keewo it finitwok'owa bako tooko nofalo kitsoshaliye. <sup>8</sup> Noo ari keewosha nofinri bako ari keewo k'efitwo eegor k'alo falatsonee. <sup>9</sup> Noo maawtswotsi nowotere it kúp'uwotsi it wottsosh gene'úwirwone, no Ik'o nok'onir it s'eenwotsi it wotitwok'owe. <sup>10</sup> Woshan itoke wokdek' befetsat tguut'ir manatse tuutsone, hank'on itok twoor doonzo taash b' imts alon itn kic'iratse, doonzo alo taash b' im itn tiagisha bako iti gaakoshaliye.

<sup>11</sup> Eshe ti eshúwotso! jamon beewere! it bebeyo manutside'ere, t izonowere beewere, it

ats atseyosh ikwotore, jeenon beewere, shunonat  
jeeniko Izar Izewer itnton wotituwe.

<sup>12</sup> S'ayin wotts jobon jobeyar jamo aatewere.

<sup>13</sup> Amants jamwots jamo itsh t'intsirune.

<sup>14</sup> Doonzo Iyesus Krstos s'aato, Ik' shuno, S'ayin  
shayro ik woto it únetsnton wotowe.

**Handr Taara**  
**The New Testament in the Borna Language of**  
**Ethiopia (Handr Taara)**

copyright © 2018 The Word for the World International

Language: Borni (Borna)

Contributor: The Word for the World Southern Africa

**Handr Taara**

The New Testament in Borna in Latin version

The Word for the World

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 8 Apr 2023

cb58eacd-0521-532d-8a14-a3dd0daa6412